

Nus essan baselgia

(suenter Susanne Labsch)

Dieu, nus t'engraziain
che ti has creà mintg'uman
suenter tes imagen,
sco dunna e sco um,
sco pli vegl e pli giuven,
sco umans cun bleras colurs da lur pel
e da bleras regiuns da questa terra.

Dieu, nus t'engraziain
che ti laschas participar nus tuts
vi da la ritgezza da tia creaziun
e vi da l'incumbensa
da la pertgiral e da la mantegnair,
sco pli vegls e pli giuven,
tras tut las generaziuns.

Dieu, nus t'engraziun
per tia pazienza e per ils bliers
segns da speranza en noss mund.
Nus t'engraziain per il curaschi da tut quels
che tschertgan soluziuns
per mantegnair questa terra,
per il bainesser da tut ils umans
e per la gloria da tai.

Nus ta rugain: regal' ans egls,
cors, senns e mauns,
per reconuscher e per dar vinavant
ils segn da ti' amur.
Quai ta rugain nus tras Jesus Cristus.

Meditaziun e ponderaziun

(da la Brasilia)

I dat tant bliers umans
che pateschan fom ed han grev,
be perquai che bliers na san betg
u han emblidà
che nus tuts essan
soras e frars.

I dat tant blers umans
senza lavur e senza in tetg sur il chau,
be perquai che blers na san betg
u han emblidà
che nus tuts essan
soras e frars.

I dat tant blers umans
che gaudan la vita
senza pensar a quels che pateschan,
be perquai che blers na san betg
u han emblidà
che nus tuts essan
soras e frars.

I dat tant bleras chaussas
che vanzan e van en malura,
be perquai che blers na san betg
u han emblidà
che nus tuts essan
soras e frars.

I dat tant blers umans
che lavuran sco mez nars e suan,
ma na els, mabain auters
tschiffan ils raps e daventan ritgs,
be perquai che blers na san betg
u han emblidà
che nus tuts essan
bain soras e frars.

Credo per la terra
(suenter Dorothee Sölle)

Jau crai en la buna creaziun da Dieu,
la terra.
Ella è sontga:
ier, oz e damaun.

Betg la violar!
Ella na tutga ni a tai,

ni a concerns.

Nus na la possedain betg sco ina chaussa
ch'ins cumpra e dovra e ch'ins bitta davent.
Ella tutga ad insatgi auter.

Tge pudessan nus savair da Dieu
senza ella, nossa mamma?
Co pudessan nus discurrer da Dieu
senza las fluras che laudan Dieu,
senza il vent e l'aua
che cun lur schuschurar raquintan dad el?
Co pudessan nus amar Dieu
senza emprender da nossa mamma
il pertgirar ed il proteger?

Jau crai en la buna creaziun da Dieu,
la terra.
Ella è qua per tuts,
betg be per ils ritgs.
Ella è sontga,
mintga singul feagl,
la mar ed il terren,
la glisch e la stgirezza,
il nascher ed il murir,
tuts chantan la chanzun da la terra.

Betg viver in di
ed emblidar ella.
Nus vulain mantegnair ses ritmus
e laschar glischar sia fortuna.
Nus vulain la defender
d'engurdientscha e pussanza.
Perquai ch'ella è sontga
pudain nus daventar libers da nossas malsognas,
perquai ch'ella è sontga
pudain nus emprender da guarir.

Jau crai en la buna creaziun da Dieu,
la terra.
Ella è sontga:
ier, oz e damaun.

Intercessiun

(Lia reformada mundiala)

Bab en tschiel, ti es ritg.
Nus t'engraziain questa damaun
che nus possian vesair la glisch da tes sulegl
e che nus possian udir l'evangeli da Jesus Cristus.

Regal' ans ureglias avertas
ed avra ils ischs a noss cors,
perche noss mauns vids vegnan emplenids
cun quai che mantegna nossa vita sin terra,
cun quai che dat senn e finamira,
cun quai che nus possian dar vinavant.

Nus ta rugain per ils blers umans,
che vivan cun nus sin la terra
e che tschertgan tai ensemen cun nus.

Dieu, emplenescha nus cun tes plaschair,
enfin che nus giajan suror da quel,
per che la terra s'empleneschia
da pasch, plaschair e salid.

Uraziun per la Sontga Tschaina

(dal Peru)

Dieu, ti vivonda dals povers,
Cristus, ti noss paun,
lascha nus sagiar da tes paun fin,
da la maisa da tia creaziun:
paun, gist prendì
or dal furn da tes cor,
vivonda che nutrescha e vivifitgescha nus,
in paun ch'ans fa esser uman,
ch'ans lascha esser colliads,
colliads en il lavurar ed en il parter,
maun en maun.
In paun anc chaud
ch'ans fa daventar ina famiglia,
al sacrament da tes corp:
Lascha nus sagiar da tes paun!

Benedicziun

(suentar D. Bromberger)

La benedicziun da Dieu
vegnia tar nus uffants, umens e dunnas,
per che nus sajan fermes en nossa forza creativa,
per che nus sajan curaschus en noss dretgs.

La benedicziun da Dieu
vegnia tar nus uffants, umens e dunnas,
per che nus dian da na, nua ch'igl è necessari,
per che nus dian da gea, nua che quai è bun.

La benedicziun da Dieu
vegnia tar nus uffants, umens e dunnas,
per che nus sbragian, nua ch'igl è malgiustia,
per che nus taschian, nus ch'igl è sgarschur.

La benedicziun da Dieu
vegnia tar nus uffants, umens e dunnas,
per che nus tschertgian e chattian sabientscha,
per che nus mussian e dettian vinavant prudientscha,

La benedicziun da Dieu
vegnia tar nus uffants, umens e dunnas,
per che nus midian la realitad
e promovian tut quai che viva.
Per che nus sajan collavuraturas e collavuratur
da Dieu sin terra!